

傷寒論注卷五

吳縣王丙樸莊著

元和陸懋修九芝校

厥陰病狀第三

五十六證方七首

厥陰病從臂肝中風而來無自鼻入者鼻入則少陰矣
上五節是論厥陰之卽病者下皆溫暑之傷寒以病非
藏於裏之極深處卽陷於下之極窮處其間轉移出入
之機與厥陰之陰盡生陽相近故比類而附之全不關
於厥陰之經脈也

厥陰之爲病消渴氣上撞心中疼熱飢而不欲食甚者則欲

吐衄下之不肯止

一本作氣上撞心心中疼熱又下之下有則利二字

經言兩陰交盡名曰厥陰東方生氣胚胎於此厥陰爲標
風木爲本木中藏火不鬱則不現人身厥陰爲闔今以寒
風鬱其經脈而闔者愈闔風動生火是以厥陰爲病之始
未有不從相火而化者火旺則隨飲隨渴實能容水故謂
之消渴凡厥陰病以消渴爲主猶太陰病以腹滿爲主尤
綱中之綱也氣上撞心者手厥陰心包之氣亦相應而闔
於膈心氣不舒故疼而熱也飢者風之擾不欲食者木鬱
胃中也蟲爲風化風自內動則生衄而從口吐出也病發
厥陰而反下之則風邪下陷而利不止矣

厥陰中風其脈微浮爲欲愈不浮爲未愈

脈浮是從陰出陽故欲愈不浮則未愈知厥陰中風之病未有不見沈脈者也

厥陰病欲解時從丑盡卯

丑時氣血注於肝寅卯則木旺時也故解

厥陰病渴欲飲水者少少與水飲之卽愈

厥陰病本消渴喜湯今寒從火化而欲飲水陰已轉陽矣少與之合水火相濟胃氣和卽愈也厥陰篇只此四條大旨已全提出蓋誤下不可早清亦不可總求胃氣之和以化相火之燥俟氣機之自轉而脈漸微浮乃可愈也此厥

陰中風之治法晉阮河南云得病熱者便以青葙苦參艾苦酒療之無不解者意卽指此厥陰病耶

諸四逆厥者不可下之虛家亦然

此言諸經病之四逆厥者皆可入厥陰例以有陰極之象也凡卽病之寒從外人者仍須外解爲順下之爲逆四逆散主之虛家者諸陽虛之證龐安常曰凡厥通用四逆湯謂脈浮遲或細或微或沈皆屬裏有寒也蓋不可下者其常下文言厥應下者乃溫暑之變耳

傷寒先厥後發熱而利者必止見厥復利

一本必字下有自字

此下論厥利嘔噦乃溫暑之傷寒有陽極似陰者有獨陰

無陽者有由陰轉陽者與厥陰居兩陰交盡處體陰用陽之變動相似故翼本目錄於此篇注云厥利嘔噦附也古人質厚能藏寒毒於肌膚至春夏變爲溫暑乃有此厥利之進退今人體虛遇感卽發伏寒本少況此等厥利又溫暑中僅有之變證一經誤治如行獨木橋三指輕推便已墮水卽應有熱六日厥反九日等證不及現矣諸家隨文敷衍蒙混千年今試略陳顛末經言熱病三日可汗三日後可泄皆是刺法所謂各通其藏脈也後人代以湯藥分別汗下法久弊生釀成神丹甘遂之技故仲景論中指出各經方治井井有條然病變無窮乃有一起卽厥至四

五日者亦有熱後厥至九日者此等證不便分屬別經故於厥陰篇中專論之謂傷寒病厥利相因利者下利非自利也蓋厥爲邪併於裏邪無從出必爲下利熱則邪達於表故發熱則利必自止見厥復利明是相因而致非純陰之厥可知

傷寒始發熱六日厥反九日而下利厥利當不能食今反能食恐爲除中食之季

一作索

餅不發熱者知胃氣尙在必愈恐

暴熱來出而復去也後三日脈之其熱續在期之旦日夜半愈所以然者本發熱六日厥反九日復發熱三日并前六日亦爲九日與厥相應故期之旦日夜半愈後三日脈之數其

熱不罷此爲熱氣有餘必發癰膿

懋修案今人於傷寒溫熱病愈後每有生癰生瘡者

此言

極驗

溫暑病發熱初起便宜青龍失治則昏昏默默

懋修案此句不可從

有病在三焦界乎半表半裏者此條發熱六日復轉入半裏而厥厥則必利利亦三焦之火從下注也厥而且利最慮入陰卽能食亦慮除中除中者胃氣革除中空易納求食反急也黍米久食令人熱煩除中者得之必卽發熱以能助胃陽外浮也厥利初起時試之知胃陽在必愈及九日後發熱尙恐來暴或去而仍陷陰分必第三日熱厥之期相應始可愈也若脈反浮數其熱不罷卽平脈法數脈

不時則生惡瘡之謂凡內癰皆是

傷寒脈遲六七日而反與黃芩湯徹其熱脈遲爲寒與黃芩湯復除其熱腹中冷當不能食今反能食此爲除中必死

脈遲爲寒指水飲言辨脈法云遲至六七日不欲食此爲晚發水停故也爲未解食自可者爲欲解晚發者自三月至夏末病傷寒也以停飲而晚發是寒水之氣久蓄於內溼蒸爲熱至六七日而脈仍遲方慮胃氣之弱不可遽徹其熱而誤以爲春夏之時氣與黃芩湯則不欲食者當益不能食矣若反能食是除中也除中則厥利而死可知以此推之凡用寒涼而致加煩渴及衄與汗者皆藥之誤不

可不慎也

懋修案若反能食則因乎腹中之冷中陽已盡是除中也

傷寒先厥後發熱下利必自止而反汗出咽中強痛其喉爲痺發熱無汗而利必自止便膿血便膿血者其喉不痺

厥與發熱只一鬱熱之氣出入所致其先厥而後熱者必熱厥相應而後汗乃爲愈徵若甫發熱而反汗出是三焦相火因鬱上炎必致咽痛而發喉痺蓋上焦本出胃上口並咽以上也若發熱無汗則熱移下焦因下利之勢爲便膿血而火不炎於上焦矣此與上條發癰膿同例當治以千金漏蘆湯

傷寒一二日至四五日厥者必發熱前厥者後必熱厥深熱

亦深厥微熱亦微

懋修案此二句世竟無人知之者矣

厥應下之而反發其汗

者口傷爛赤

此言傷寒之先厥後熱者日數之多寡雖不等而發熱則總可必也蓋春夏之病若全不似暍溼則非新感之邪而爲久鬱之寒可知既不見太陽經脈證又不見六經相傳證知其熱必在三焦之半表裏而一人必一出故前厥者後必熱也厥有深淺微甚之不同亦必與熱相應當厥深時便知熱深應用大柴胡下之若反發其汗則辛溫之品直走陽明立見口傷而爛赤故戒之

凡厥者陰陽氣不相順接便爲厥厥者手足逆者是

此申言厥之故也蓋太陽交於厥陰爲陰陽氣相順接之始今少陽三焦樞因陽明之闔而不得通則太陽不能承陽明之氣而開達於厥陰可知三陽俱不通三陰又何由而順接哉成注手三陰三陽接於手十指足三陰三陽接於足十指陽氣內陷不與陰接故手足厥冷也

傷寒病厥五日熱亦五日設六日當復厥不厥自愈厥不過五日以熱五日故知自愈

厥熱相應而復厥者氣猶未得其平也陽明居中土數五故厥終以五日爲常厥熱得平則陽明之氣已和而陰陽相順接矣上條厥熱逾五日之數故發癰膿

傷寒脈微而厥至七八日膚冷其人躁無安時此爲藏結死

一作藏厥懋修案千金作此爲藏寒虵上入其膈與下條併爲一條

藏指胃言微卽平脈法所云毛爲肺脈也厥爲三焦鬱而反得肺金收瀉之象木氣之不伸可知所以厥至七八日不但四逆而周身之膚俱冷明是相火陷入胃中燔灼糟粕煉成燥屎不能傳送幽門宜其躁無安時也此於初厥時頻進涼膈散等或可十全一二耳

虵厥者其人當吐虵令病者靜而復時煩此爲藏寒虵上入其膈故煩須臾復止得食而嘔又煩者虵聞食臭必出其人常自吐虵虵厥者烏梅丸主之又主久利

此言虵厥不宜下也藏寒胃寒也胃寒必兼肝熱則飢不欲食而虵動故虵厥爲寒熱錯雜所致此厥陰中風之但吐虵而不厥者與傷寒後之虵厥皆可主以烏梅丸也戴元禮云胃冷必吐虵人皆知爲陰證然亦有陽證吐虵者蓋胃中無穀氣故虵上求食而吐須看別證何如不可專以胃冷爲說曾治一陽黃吐虵大發斑毒以冷劑取效是亦有陽證矣

烏梅

三百枚

乾薑

十兩

黃連

十六兩

當歸

四兩

蜀椒

四兩

細辛

附子

炮

桂枝

人參

黃蘗

各六兩

右以苦酒浸烏梅一宿去核蒸之五升米下搗如泥和諸

藥令相得曰中與蜜杵千下丸如桐子大先食飲服十丸
日三服少少加至二十丸禁生冷滑物臭食等

內經曰必伏其所主而先其所因病在厥陰以酸爲瀉
辛爲補君烏梅之大酸伏其所主也佐以椒桂薑附先
其所因也因於風寒也肝欲散細辛當歸以散之肝有
熱黃蘗以清之柯氏曰寒熱並用氣味不和故佐以人
參調其中氣以苦酒漬烏梅同氣相求也蒸之米下資
其穀氣也少與漸加緩以治其本也虵得酸則靜得辛
則伏得苦則下殺蟲之方無出其右者久利則虛調其
寒熱扶其正氣其利自止

傷寒熱少厥微指頭寒默默不能食煩躁數日小便利色白者熱除也欲得食其病爲愈若厥而嘔胸腹煩滿

懋修案千金作胸脇

煩滿

其後必便血

指一作稍

此言厥微者不宜下也熱厥並見而微熱之淺者屬上焦難經云上焦在胃上口主內而不主出其治在膈中不食煩躁膈中病也許學士云膈中血聚則小腸壅宜用海蛤散小便血行則愈此爲血結胸婦人多有之愚按男子亦常有此證小便利而白小腸不壅矣欲得食膈中之氣治矣若厥時又見嘔與胸膈煩滿則上焦之熱漸移於中下二焦而血聚膈中者從便而解矣

病者手足厥冷言我不結胸少腹滿按之痛此冷結在膀胱關元也

此言陰結膀胱之厥不宜下也厥屬上焦虛臆中血聚今問之而不結胸是病在下焦故少腹滿而按之痛關元詳太陽篇血室注言膀胱又言關元者以冷結在膀胱血分也宜溫通下焦血絡爲主

傷寒發熱四日厥反三日復發熱四日厥少熱多其病當愈四日至六七日熱不除必清膿血

此與下節言厥熱之多少以定病之愈不愈也清與圍同脈經云清者廁也